

兩浙名賢錄

兩浙名賢錄卷之三十一目次

武功

宋

殿前都虞候張伯玉瓊

鎮海軍司馬孫承祐

子誘附

兩浙都鈐轄沈承禮

知龍泉沈濟叔希稷

台州鎮將杜伯僖

子幼常幼偉孫士賢附

鄧熹

武功目次

卷之三十一

光澤堂

趙育才

薛彥明開

兄閻閻從子居實從兄謹言里人鮑若雨包汝諧附

黃仁環

唐子容附

王達

陳彥聲宗舉

承信郎閻丘民表觀

殿前將軍章淑

承信郎方彥通庚

子五人附

統軍王子武

錢學山

弟胥附

鞏州通判唐至

任彥遠

李侗董之邵附

趙權

神勇軍統制呂希祖
涓孫

檢校少師孟璞
玉珙

元

吐蕃宜慰使陳萍

知吉州軍事楊國華
實

東坡自序

卷之三十一

二

光緒堂

東陽尉王靖翁安國

武略將軍董彥光

弟沈博
二子附

明

周德問

袁千戶興

昭信校尉王仕龍威

弟永
和附

田子貞貞

永康翼左副元帥呂用明文燧

弟玄明佐
李文附

浦江翼左元帥吳志德

蔣可
大附

吳啟明文秀

義兵千戶葉良器

良殷景陽
孟圭附

駕前親軍指揮周得璇

吳伯榮壽孫

子仁
附

陽朔縣知縣蔣公直

指揮同知蔣貴

燕山左護衛指揮僉事陳良輔翼

父典
附

仁和衛千戶王時泰業

懷遠將軍崔惟正端

劉原熊

山西道監察御史項思誠

禮附 曾孫守

王剛甫

指揮僉事彭懷遠

都督同知牛允武

海寧衛左所百戶陶炳

海寧衛正千戶滿正

嘉興所正千戶張淮

都督同知萬民望

溫處守備盧子鳴鏜

金叅將丹

朱總兵先

台州指揮僉事陳大成

范文學希雲

兩浙名賢錄卷三十一 目次終

兩浙名賢錄卷之三十一

東海徐象梅仲和氏撰

鹽官查允亮具鄉氏閱

武功

宋 共三十九人

殿前都虞候張伯玉瓊

張瓊字伯玉其先自館陶徙衢遂爲衢之常山人世爲
牙中軍瓊少有勇力善射隸太祖帳下周顯德中太祖
從世宗南征擊十八里灘砦爲戰艦所圍一人甲盾鼓

謀而前衆莫敢當太祖命瓊射之一發而踣淮人遂却
及攻壽春太祖乘皮船入城濠城上車弩遠發矢大如
椽瓊亟以身蔽太祖矢中瓊股死而復蘇鐵着髀骨堅
不可拔瓊索杯酒滿飲破骨出之血流數升神色自若
太祖壯之及卽位擢典禁軍累遷內外馬步軍都軍頭
領愛州刺史時太宗自殿前都虞候出尹開封難其代
者太祖曰殿前衛士如狼虎者不啻萬人非瓊不能統
制卽命瓊代爲都虞候遷嘉州防禦使瓊性暴無機多
所凌轢時史珪石漢卿方用事瓊輕侮之日爲巫媪二

人銜之切齒發現擅乘官馬納李筠隸僕畜部曲百餘人恣作威福禁軍皆懼時建隆四年秋郊禋制下方欲肅靜京師乃召訊瓊瓊不伏太祖怒令擊之漢卿卽奮鐵撾亂下氣垂絕曳出遂下御史案鞫之瓊知不免行至明德門解所繫帶以遺母獄具賜死太祖旋聞瓊家無餘財止有僕三人甚悔之因責漢卿曰汝言瓊有僕百人今何在漢卿曰瓊所養者一敵百耳太祖遂優恤其家以其子尚幼擢其兄進爲龍捷副指揮使

鎮海軍行管司馬孫承祐

子諤附

孫承祐錢塘人其姊爲錢俶妃因擢處要職累遷浙江東道鹽鐵副使鎮海鎮東兩軍節度副使知靜海軍節度事開寶初隨俶子惟濟入貢詔授光祿大夫檢校太保鎮海鎮東等軍行營司馬俶又私署中吳軍節度七年俶復遣承祐入貢令諭旨於俶將有事於江表及王師渡江命內客省使丁德裕率步騎一千詔俶以所部與德裕會攻常潤承祐從俶克毘陵功居多改中吳軍爲平江軍真授承祐節太平興國中俶來朝盡獻其地徙泰寧軍節度使從幸大名留知府事雍熙二年改知

滑州數月卒贈太子太師中使護葬承祐在浙右且憑藉親寵恣爲奢侈每一飲宴凡殺物命千數常膳亦數十品方下箸從車駕北征以索駝負大斛貯水養魚自隨至幽州南村落間日已曷西京留守石守信與其子駙馬都尉保吉及近臣十數人尚未朝食適遇承祐卽延人所止幕中膾魚具食窮極水陸人皆異之承祐少時嘗夢人以著草一本增其一而授之旣寤以語所親曰大衍之數五十其用四十有九今增其一我壽止於此乎果五十而卒子誘至駕部郎中出爲淮南節度行

軍司馬

兩浙都鈐轄使沈承禮

沈承禮湖州烏程人。錢鏐辟置幕府。署處州刺史。鏐子元璿以女妻之。署爲府中右廡。出爲台州刺史。元璿卒。子佐嗣。以承禮掌親兵。俛卽位命。知威武軍節度事。克兩浙。都鈐轄使。王師征江南。俛遣承禮率水陸數萬人。助克金陵。因攻潤州。城中兵夜出焚外柵。諸將皆欲馳救。承禮曰。兵志有云。擊東南而備西北者。此之謂也。命士皆擐甲。燔食。堅壁不動。他壘不設備者。悉驚擾。獨承

禮所部敵人不敢窺丹陽平遂率兵抵建業李煜歸朝
錄其功真授福州節制太平興國初假書獄浙右地徙
承禮鎮密州八年卒年六十七廢朝二日贈太子太師
中使護葬

知龍泉沈濟叔希稷

沈希稷字濟叔湖州人宣和初知龍泉三年睦賊洪載
入寇諸邑皆陷龍泉民情洶洶希稷毅然爲守禦計賊
至與戰大破之事平朝廷嘉其功增秩一等在邑五年
去之日送者攀轅涕泣爲立三賢堂於玉峯寺以祀之

台州鎮將杜安常伯僖

子幼常幼僖孫士賢附

杜伯僖字安常東陽人猿臂善射熟韜畧多智計以功名自期宣和盜起大將楊惟中率師進討伯僖杖策謁於軍門惟中與言大喜留之幕下運籌制勝出奇無窮房與賊對勇氣溢發橫戈而前賊無堅陣賊平授誠忠郎轉台州鎮將歷史館檢閱紹興間妖賊嘯聚東鄉鎮將王公雅問計於伯僖伯僖曰愚民迫飢寒弄兵山谷間非其本心但殲厥渠魁則脅從自解若縱兵窮討必且濫及無辜公雅從之民獲保全後其子幼常幼偉孫

士賢俱登右科。躡顯仕。人以為陰德之報。

鄧熹

鄧熹遂昌人有勇畧善文章宣和中。雅寇犯松陽。遂昌間熹散家財結里中拳勇。少年入邑禦侮。賊至與戰。出奇破之。賊衆奔。餉兩邑。遂全郡。將黃葆光聞於朝。增秩賜金以榮其歸。仍官其一子。

趙育才

趙育才與鄧熹同里。政和中。選爲武學博士弟子。膂力絕人。更精於射。去百步而射。楊葉無不中者。時稱猿臂。

方臘叛與熹父子集趨壯相銜角邑人恃以安堵時松陽賊侵掠及境乃率所部格於孟山前賊勢張甚育才手射殺數十賊矢盡擲弓於地橫刀直入賊陣賊衆披靡分兩翼左右合擊育才復砍殺數賊力盡死於碭下聞者莫不太息

薛彥明開

兄開闢從子居實從兄謹言里人鮑若用也汝能將

薛開字彥明永嘉人徽言之族子少喜讀孫吳兵法慨然有澄清天下之志宣和末俞寇猖獗開與兄開闢及閻子居實謀曰郡將預爲守禦計弗許乃與里人鮑若

雨包汝諾議鳩財積穀陰合里中少年族中子弟授以
兵器分地自保時教授劉士英與石礪畫城爲人界率
義民以守之開自與閻守城南之西隅而使居實總其
綱寇至攻永泰門肉薄而登居實發弩開櫛禦從兄謹
言奮擣斃其先登者寇氣懾而退開復簡精勇數十人
夜縋城下斫其營寇驚走自相蹂躪死者不計其數寇
遂弃寨去事平口不言功鄉人高之

黃仁環

唐子容附

黃仁環浦江人生而勇悍有智略喜談兵而議論多依

名節方臘之亂鄉里不逞多從之者仁環以爲耻獨奮
勇出身保禦郡守上其功授承信郎建炎初山賊作亂
仁環呼諸子謂曰吾受國恩恨無以報誓當以計禽賊
乃與友人唐子容謀僞與賊合賊信不疑仁環語其首
曰今欲破縣兩主不宜俱行俱行誰守寨者吾初歸無
以自效願率子弟爲先鋒陷陣諸酋大喜盡命賊衆聽
仁環指揮仁環乃引衆東行十餘里將覆賊乃詭分兩
道出攻虛整部伍密令子容等各插竹於首以爲標識
與賊兩兩相夾部分既定仁環奮刀大呼曰轉陣殺賊

賊衆出不意，錯愕不知所爲。皆束手受刃，千餘人脫者無幾。諸酋留者，仁環令諸子饗於家，酒酣，用大斧斫殺之。初，仁環有女嫁賊黨中，或曰：公報國固善，如愛女何？仁環曰：吾恐事不就，一女何足惜？至是其女竟爲賊所害。仁環官至訓武郎，卒，鄉人感其德，立祠祀之，血食至於今不衰。

王達

王達，縉雲人。生有勇力，善劍槊，能步聞。宣和間，方臘寇縣，勢甚披猖。尉詹良臣以力戰死，人情洶懼。達乃率

壯士數百人從間至仙居會呂師囊爲內應取道檄官軍夾攻之遂大破賊鄉邑乃全事定身退口不言功郡守上其事授承信郎不受卒之日男女走哭者數千人引率立祠祀之請於朝封忠烈侯

陳彥聲宗譽

陳宗譽字彥聲東陽人宣和間盜起睦州鄉邑無賴有謀欲應之者宗譽聞之急竄身無賴中察其稍解事者一二人力諭以禍福使轉相告警應聲解散得不從亂安撫使劉述古聞而賢之知其有可用才因命宗譽糾

合義兵以衛鄉井。宗舉卽椎牛置酒，悉呼向所議無賴諸少年縱飲之。酒酣，宗舉語諸少年曰：「從賊之與從義，相去甚遠。從賊則禍及宗族，且沒身而受惡名；從義則保全里閭，卽及身而受上賞。惟諸君熟計之。」諸少年曰：「向微陳父言，吾屬爲不義死矣。今之身，陳父之所生也，敢不惟命是聽。」宗舉大喜，盡醉而去。諸少年歸，各率其黨操戈荷鍤，手弓橐矢，而前以聽宗舉約束。宗舉卽以兵法部伍之，畫地爲守，賊偵有備，不敢犯。民用安堵，述古欲官之，宗舉不肯，曰：「吾用諸少年力而一身受賞，能

無報。顏乎述古聞而更賢之。稱曰義士而不名。建炎初盜起。宗魯從率諸少年扞禦立功。及論賞。又拜郡錄其前後功。奏補承信郎。又拜有司。臨以朝命。不得已散家財。適勞諸少年。而後受職。未幾轉承節郎。貤貽守監司。薦其才。除沿邊巡檢。不赴。卒於家。

承信郎閻丘民表觀

閻丘觀字民表。遂昌人。側儻有大志。宣和癸丑。陞州寇變。賊酋洪載陷松陽。據其城。分兵以攻遂昌。勢張甚。朝廷下詔招安之。當事者縮首莫敢往。觀慨然請行。遂單

身賁詔入賊營以義撼之成約而反朝廷嘉其功授承
信郎靖康初京城失守本路帥命觀率衝發處三州兵
赴難及至二帝已北轅痛哭旋師遇高宗渡江勤王率
所部歸之高宗大喜特旨轉三官後以軍功歷九任積
官至武翼大夫

殿前將軍童淑

童淑壽昌人面如紫玉赤睛虎鬚有膂力能挽強弓射
百步外無不貫心洞脅者鄉里服其勇宣和中文貫討
方臘淑仗劍歸之請獨當一面以淑知山溪險阨命

率銳卒數百爲前鋒開道。賈以大兵繼之。淑轉戰而前。賊徒奔潰。直抵青溪。方臘據巖險自固。不出。分兵塞隘。以困之。會韓世忠從間道人幫源禽臘以出。賊黨悉平。淑功爲多。擢殿前將軍。領宿衛。建炎初。汪來一來二寇。闔越東南騷動。朝廷命淑率師討平之。授江南東路安撫司撫屬。卒。贈太尉。

承信郎方彥通庚

子文燧。文傳。文郁。文思。文翰。附。

方庚字彥通。淳安人。家世業農。庚躬耕隴上。喟然歎曰。世方多事。大丈夫當隨時立功。以名不朽。奈何沾體塗

足甘以老農終耶。昔周文育以大槩取富貴鄉里至今以爲美談。吾能荷七尺鋤，獨不能運丈二槩乎。遂擲鋤於地，從人學兵法，賣牛買劍，橫磨之日，以此自立足矣。已而平方臘，破兀朮，屢立戰功，拜承信郎。子五人文燧，文博文，郁文，思文，穎少，俱從庾於戍馬間。庾復指授諸進退坐作，攻殺擊刺之法。諸子故俱有膽力，以能戰聞。淳熙間，金人再寇，乃哀義兵取勝。文燧以承信郎出身，官統制，文博文承信郎，文彬進義校尉，知桃源庫務。

統軍王子武

王子武嘉興人初爲統軍睦寇方臘作亂橫行州邑殺
平民二百餘萬蹀血轉閉官軍莫能挫其鋒來攻秀州
去城南一舍而陣衆號十萬子武白太守曰今日之政
公職守子武職戰請背城借一以報國家請速具軍輿
翦此而後朝食乃下令簡精銳五百人長兵在前短兵
相接弓矢分左右翼夾射遂啟門鼓噪而出太守復率
百姓登陴雷鼓發喊以助之屋瓦皆震戰士勇氣百倍
莫不一當百賊大駭奔潰追奔數十里斬首五千級築
京觀五以表其功賊遂退據臨安不敢北向以窺江淮

者由子武以孤軍遇之之力也

錢學山

弟鬻附

錢學字學山淳安人與弟鬻俱讀書尚氣節宣和中方臘之亂州邑多被殘破學與鬻團民兵衛鄉井民服其令建炎己酉兀术大舉人寇高宗幸海道虜犯臨安沂浙江而上學與鬻同邑人方庚幸民兵三千東赴至桐廬縣西牛頭山下視其迫險可以置伏遂偃旗息鼓以俟敵至忽鳴鼓揭旗呼噪兢起矢石如雨學橫戈擣其中堅鬻與庚張兩翼夾擊之虜衆大敗遽北遁高宗回

武功

卷之三十一

七

光碧堂

蹕嘉其功各授承信郎項之衢寇張花項犯歛逼於嚴
定復率義兵破走之羣盜聞其名稱爲二虎未幾以
紹定初江東部使者列其功詔封爵爲惠顯侯爵
惠濟侯立祠祀之賜廟額曰英烈

鞏州通判詹至

詹至建德人官鞏州通判時金人入寇將至鞏界至聞
報卽入與家人訣出坐堂皇上鳴鼓集吏士揮涕語之
曰昔人云君辱臣死二帝北狩四海痛心義與虜讐天
不共戴非盡覆之不足以雪耻若至城下而後圖之則

重圍受困矣。宜及其馬足未停，士腹未飽，先出奇以覆之。然後快顧諸君計將安出。吏士奔應曰：「運籌帷幄，是在明公。某輩但有熱血一腔，爲明公報國耳。」至慨然曰：「是誠在我。」遂下令選精銳二千人，授以長戈大斧，去城三十里而伏。俟虜過，從後斫刺以感之。勅尉率民丁數百人於城南掘穿數十處，以蘆條蓋之。上覆以土布，煮豆於穿北，以引其馬。又選精銳三百人，授以強弩，伏城濠中。俟虜馬蹶，從濠中起射。又選精銳二千人，授甲盾矛戟，伏城左右爲內應。今日聞砲，伏者起，內者出。遠令

者斬於是令男子登陴婦人治糗至躬坐敵樓以待明日虜大至去窸數十步馬聞豆香爭馳而前忽墜窸中人馬相枕籍後騎爲伏兵所蹙勢不能止如山摧砲聲一舉濠矢如飛蝗城中伏兵鼓噪而出前後夾擊大破之斬獲過當殘虜駭還城邑乃完張浚以爲能辟置幕下浚每有戰伐至之借箸爲多浚薦於公積官至左中奉大夫及卒浚深惜之命子扶銘其墓

任彥遠載

李侂董之碑附

任載字彥遠奉化人少英敏多勇略喜讀書每慕張子

房諸葛武侯之爲人嘗歎曰假令二賢而在吾願爲志
執鞭識者知其不凡與同邑李佺董之邵以慷慨好義
義稱卽四方慕義者莫不推此三人三人亦深相結以
名節相期許建炎三年金人陷明州縱兵大掠諸縣多
被殘毀戢與佺之邵奮義鼓勇共率家丁數百人禦於
泉口每乘間出奇以擣虜虜不敢犯奉化得全當路上
其事有詔俱官修武郎三人者相視而笑各不受

趙樞

趙樞東陽人氣豪而有材畧挽強弓射百步外皆摘掄

心時稱能手。宣和中。睦寇猖獗。權仗劍詣大將楊惟中。請獨當永安。一而惟中壯之。簡鎗杖手三百人。隸焉。權轉戰而前。賊無敢當其鋒者。連破青石。光明。上清諸洞。皆生禽其酋。致之幕下。乃令里中少年協力固守其地。而自部鎗杖手四出殺賊。賊望風而逃。四境安堵。帥府上其功。詔授廵功郎。尋補東陽尉。追捕盜賊如鷹搏兔。見蹤必獲。盜賊畏之。終其任無敢竊發者。卒於官。

神勇軍統制呂希祖渭孫

呂渭孫字希祖。東陽人。紹興間。武舉高第。歷有軍功。累

陞殿前司統領官荆湖宣撫使薛象先聞其忠勇擢爲
神勇軍統領制使募兵以守樊城簡帳下千人授之涓孫
將行坐教場豎紅白二旗語衆卒曰吾此行誓以死報
國能借死則可借牲一人貪生則吾事敗矣願行者立
紅旗下不願者立白旗下趨而之紅旗下立者僅四百
人涓孫卽以六百人還宜司因下堂勞四百人徧拜之
然後出令有一卒入人家誤碎其釜者涓孫立斬之衆
大驚所過秋毫無犯更募得四千人率守樊城每出奇
禦虜嘗時稱爲名將後爲副都統魏友諒所疑使其婿

官之三軍爲之雪涕。

檢校少師孟璞玉琪

孟琪字璞玉歸安人防禦使宗政子勇而有謀金人犯襄陽駐兵關山琪料其必闕樊城獻策宗政由羅家渡濟河諸軍臨渡布陣金人果至半渡伏發殲其軍宗政被檄援棗陽臨陣父子相失琪望敵圍中有素袍白馬者琪大呼曰是吾父也橫矛躍馬突圍而入敵衆披靡拔宗政以歸由是顯名累功授忠翊郎辟京西第五副將樞管神勁左右統制宗政招唐鄧蔡壯士二萬餘人

號忠順軍命江海總之衆不安制置司以琪代海琪分其軍爲三衆乃帖然乃白制置司翔平堰於棗陽溉田十萬頃立十莊三轄使軍民分屯是年收穀十五萬石又命忠順軍家自育馬官給芻粟馬益蕃息升京西第五正將棗陽軍總轄本軍屯駐忠順三軍紹定六年大元將那顏侂蓋追金主完顏守緒逼蔡檄琪討金唐鄧行省武仙仙時與武天錫及邵守移剌瑗相犄角爲金盡力欲迎守緒入蜀犯光化鋒剽甚琪逼其壘一鼓拔之斬天錫獲首五千級復犯呂堰琪督諸軍追擊之進

通大河退逼山險。砦軍四合。金人奔輜重走。獲甲士五十有二。斬首三千。馬牛橐駝以萬計。瑗懼。遣其部曲奏書請降。琪單騎入賊。瑗請死。伏階下。琪命易衣冠。以賓禮見。聞者風動。於是順陽令李英以縣降。申州安撫張林以州降。仙愛將劉儀以壯士二百人降。時仙所據九砦。其大砦石穴山。以馬蹬沙窩帖山三砦爲蔽。劉儀曰：「三砦不破。石穴未易圖也。若先破離金砦。則王子山砦亦破。帖山沙窩孤立。三砦成禽矣。」琪乃遣兵向離金。令諸軍執黑旗入砦。金人不疑爲宋兵。乃分據巷道。大呼。

縱火掩殺。幾盡。直擣王子山砦。斬金首小元帥。梟其頭。
軍聲大振。乘勝攻下馬蹬。火光燭天。殺修山禎。師還至
沙窩西。與金人遇。大破之。是日三戰三克。默候里砦不
攻而自下。板橋石穴守將安威王顯大懼。乃因劉儀乞
降。而顯軍猶未解甲。琪單騎入其砦。周視良久。乃去。如
素所撫循者。饗以牛酒。皆醉飽。歌舞琪料。武仙將上帖
山絕頂。窺視。令樊文彬詰旦奪帖山。駐軍其下。前營設
伏。後遮歸路。已而仙衆果登山。及半。文彬麾旗伏兵。四
起。仙衆失措。枕籍崖谷。山爲之精明。日攻石穴九砦。葺

食啟行晨至石穴時積雨未霽文彬患之琪曰此雪夜
擒吳元濟之時也策馬直至石穴分兵進攻自寅至巳
力戰九砦一時俱破武仙遁走降其衆七萬人獲甲兵
無算還兵襄陽轉修武郎鄂州江陵府副都統制元遣
宣撫王楫約共攻蔡制置司謀於琪琪請以二萬人行
因命琪盡護諸收金兵二萬騎繇真陽橫山南來琪鼓
行而前金人戰敗却走追至黃陂斬首千二百級退
柴潭立柵蔡人恃潭爲固琪命決其潭實以薪葦遂濟
師攻城城中絕糧老弱互相食諸軍日以人畜骨和芹

泥食之。琪帥師向南門，至金字樓，列雲梯，令諸將聞鼓則進。馬義先登，趙榮繼之。萬衆肉薄，大戰城上，降其丞相烏古論栲栳，殺其元帥兀林達及偏裨二百人。門西啟，招僭蓋入，江海執其叅政張天綱。琪問守緒所在，天綱曰：「城危，卽取寶玉置小室，聚以草蔬，泣自經，曰：『死便火我。』」烟焰未絕，琪與僭蓋分守緒顛骨，以歸。特授武功郎，主管侍衛馬軍行司公事，制置司奏留琪襄陽兼鎮北軍都統制，鎮北軍者琪所招中原精銳百戰之士，萬五千餘人，分屯巢北樊城、新野、唐鄧間。俄令赴樞密院。

稟議授帶御器械暫駐黃州朝辭上曰卿名將之子忠勤體國破蔡滅金功績昭著賜賞甚厚兼知光黃二州增陴浚隍蒐訪軍實邊民來歸者日以千數爲屋三萬間居之厚加賑貸兼主管管內安撫司公事節制黃蘄光信四郡軍馬元兵女八陽諸郡守相率遁去江陵危急詔沿江淮西遣援衆無踰琪者乃先遣張順渡江琪以全師繼之破砦二十有四還民二萬襄陽圍解封隋縣男擢高州刺史忠州團練使兼知江陵府京西湖北安撫使未幾授鄂州諸軍都統制元兵分寇襄陽淮

甸、靳、舒二守委郡去。光守遂以州降。合三郡八馬糧械。攻黃守王鑑。帥萬文。戰不利。珙入城。軍民喜曰：「吾父來矣。」駐帳城樓，指畫戰守，全其城。斬逗留者四十有九人。以徇。諸將士彌月戰，苦病傷者相屬。珙遣醫者視療，士皆感泣。授定遠軍承宣使，帶御器械。鄂州江陵府諸軍都統制。珙以三軍賞典未頒，表辭，不許。未幾，授樞密副都承旨。京西湖北路安撫制置使，兼知岳州。乃檄江陵節制司，擣襄郢。於是張俊復鄂州，賀順復荊門。軍曹文鏞復信陽軍，劉全三戰皆捷，復樊城。遂復襄陽。初，詔珙

收復荆襄。珙謂必得郢。然後可以通餽。餽得。荆門。然後可以出奇兵。由是。指授方畧。發兵深入。所至皆以捷聞。未幾。元將塔海并禿雪帥師入蜀。號八十萬。攻珙。知夔州。珙提兵疾走。卽增置營砦。分布戰艦。遣張舉帥銳卒從間道抵均州。防遏元兵退走。升夔路制置大使。兼屯田大使。元兵至三川。珙下令。應出戍。主兵官不許失奔。寸土。權開州梁棟乏糧。請還司。珙曰。是棄城也。棟至。斬其首以徇。由是。諸將稟令。惟謹。拜檢校少保。進封漢東郡公。兼知江陵府。珙謂其佐曰。政府未之思耳。彼若以

兵綴我上下流急將若之何。琪往則彼擣吾虛不往則
誰實扞患識者是之。詔荆湖調兵五千。戊安豐援壽春。
琪遣劉全將以往。有命分兵三千備齊安。琪言黃州與
壽昌五江口隔一水耳。湏兵卽渡何必預達。先一日。則
有一日之費無益。有損萬一。上游有警我軍已疲。非計
之得也。不從。琪至江陵。登城歎曰。江陵所恃三海。不知
沮洳有變爲桑田者。敵一鳴鞭卽至。城外蓋自城以東。
直至三汭無所限隔。迺修復內隄十有一。別作十隄於
外。有距城數十里者。沮漳之水舊自城西入江。因障而

東之俾遠城。北入於漢。而三海遂通。爲一。隨其高下。爲
置蓄。漫三百里。間渺然。巨浸。土木之工。百七十萬。民不
知。後元將大納。至江陵。遣楊全。伏兵荆門。以戰。珙先期
諜知。達於樞密。檄兩淮。爲備。兩淮不知也。後果如所報。
初。珙招鎮北軍。駐襄陽。李虎王旻軍亂。鎮北亦潰。乃厚
招之。降者不絕。行者范川吉密通降款。以所受告爲贖。
珙白於朝。不從。珙歎曰。三十年收拾中原人。今志不克。
伸矣。病遂革。乞休。致授檢校少師。寧武軍節度使。致仕。
終於江陵府。訃聞。帝震悼。輟朝三日。贈太師。封吉國公。

謚忠襄。珙忠君體國之念，可貫金石。在軍中與叅佐部
曲論事，言人人殊。珙徐以片言折衷，衆志皆慚。名位雖
重，惟建旗鼓臨將吏，而色凜然無敢涕唾者。退則焚香
掃地，隱几危坐，若蕭然無事。其學遠於易六十四卦，各
繫四句名警心易，亦通佛學，自號無庵居士。

元 共七人

吐蕃宣慰使陳萍

陳萍，婺之蘭谿人。宋丞相宜中弟自中之子。宋亡，育於
外家楊氏。元世祖物色宜中子孫，得萍大喜，奇其骨相。

厚遇之。萍刻意於學，兼通梵教，尤精騎射。世祖以爲才，賜名輦，真伽刺思入侍。東官日見親幸。成宗時，吐蕃入寇，邊烽告警，以萍領吐蕃宣慰使，帥兵討而平之。悉定其地，賜上尊裝衣，獎諭甚至。及武宗朝，以萍習知西事，特命撫寧邊陲。初入敵境，有數千騎整衆而來，猝與之遇，亟令從騎解鞍列坐，環以重車如城郭。左右指揮外，示開暇，敵疑有伏，懼莫敢前。敵有以所戴白幘揭於竿首者，萍引弓一發，中之，遂驚駭遁走。由是諸部服從，不敢叛入朝。以功拜大司徒，進階銀青榮祿大夫。

知吉州軍事楊國華實

楊實字國華諸暨人明經兼通武略少補邑博士弟子
員累舉進士不第遂弃去築室桐崗博綜羣籍攻苦食
淡不積櫛者十餘年遂盡通天文地理風角鳥占奇門
遁甲之術延祐間以人材徵乃起歷知吉州軍事時逋
寇犯境勢剽甚民心洶懼實簡精壯授甲登陴復厚募
驍勇數百人分爲三隊以左右翼爲兩魏自將中軍奮
勇先登賊衆奔潰追斬不可數計悉平之捷聞特進河
南東路檢法升都奏進院檢試南宮號稱得人遷大理

丞當時稱上馬殺賊下馬能作露布者莫不首推楊國華

東陽翁王靖翁安國

王安國字靖翁東陽人遷之孫也淵魯有智略以門功授成忠郎當入官會宋亡不果元始有江南人心危疑未輯往往兵起安國以策干大帥高曲歷陳撫綏之計署東陽尉能布威立信以馭其民士山民畏服等恃險為亂殺官慰使陳天佑行省左丞史弼將兵來討安國詣軍門上謁曰此鼠輩耳宜慰不戒遂致披猖力能縛

之寧。頃大舉以費軍興。弼因遣之。安國親入賊窟。手縛其渠魁。以獻。弼大喜。曰：使吾兵不血刃而獲賊首者。尉之力也。延置幕下。將薦用之。以親老辭。無何而寧海妖賊楊鎮龍反。玉山境接寧海。據爲巢穴。勢殊猖獗。安國率鄉兵扼險要。拒之。賊出閉輒敗。乃從間道趨義烏。遇官兵與戰。賊衆奔潰。安國卷甲追之。遂禽其酋。安國爲人謹厚重。然諾。民服從之。有訟不直於官而惟尉言是正。鄉閭賴以安輯者二十年。歿後。民有肖其像而祀於家者。

武略將軍董彥光

弟舜傅子谷彪廷輔附

董彥光新昌人。生平慷慨有志節。至正間盜馮輔卿作亂。陷新昌。彥光斥家財招集義民屯境上。明日盜擁衆而西。彥光設伏以弱兵引之入隘。遂與弟舜傅子谷彪廷輔挺劍直前。伏起。張兩翼夾擊之。禽輔卿梟其首。俘賊黨數千人。郡將上其功。詔授武略將軍。僉元帥府事。子弟三人俱授武信郎。

明 共三十八人

周德問

周德間松陽人少通書史尤精武略值元季寇亂屢率子弟保障鄉邑及王師下括蒼辟德間守禦處州復合兵數萬東取甌城屢立奇功身退不言有大樹將軍之風後上論功頒賞懇辭不受人益高其節乞身家居損貲築白龍堰淮東鄉田數百頃民饒獲至今因更其名曰周公堰

袁千戶典

袁興錢塘人少好騎射不事生業元季兵興爲義兵百戶屢出奇破賊賊聞風解散歲乙未率衆來歸隨征宣

州功多授千戶諸暨之役有劉總管者爲賊所執與橫
刀策馬突入賊陣衆披靡莫敢當斬首數十拔劉以歸
主帥憐之以爲已功與恬不爲怪亦未嘗以語人人咸
服其量軍士嘗乏食與解銀甲易粟活之及王師進攻
雲南之麓海興時從征慨然謂同列曰吾此行不生禽
渠魁不返也至是請前鋒遂力戰以死詔遣使祭之贈
明威將軍指揮僉事

昭信校尉王仕龍威

弟永和附

王威字仕龍義烏人個儻有大志喜談兵而習弓馬元

未寇犯永康乃與其弟永和招集義兵拒於黃龍寨破
之戊戌冬王師下婺州威率衆歸附卽命以所部隸帥
府從征有功除昭信校尉觀海衛百戶陞武略將軍紹
興衛後所副千戶子孫世襲開國以來義烏有世襲自
威始

田子貞貞

田子貞名貞以字行永康人至正丁酉寇起緡雲鄉民
多奔竄巖穴且飢饉頻仍道殫相望子貞出粟賑之皆
羅拜曰我等已在鬼錄賴公生我倘有所役雖蹈水火

無恨子貞因結爲義旅使扞鄉井寇不敢犯燕訪使者
檄授巡檢。癸戌天兵下浙東而七閩猶未歸職方陳
友定遣使持空名勅授子貞武義縣尹子貞知天命有
歸遂縛使者戮之而焚其書。

永康翼左副元帥呂用明文燧

弟玄明任季文附

呂文燧字用明永康人元至正間括寇爲亂郡縣發兵
討之皆敗遠近騷然文燧與諸弟侄合謀散家貲率衆
以備之設禁令明賞罰諭以大義衆有固志賊陷縣治
四出焚掠文燧使弟玄明侄季文帥四百人迎敵屢戰

皆捷會官兵至與之夾攻賊敗走復其縣帥府論功將授文燧等官皆辭後賊復扇飢民爲亂文燧詣帥府白之卽命文燧總制民兵討賊乃與其弟侄分道出奇屢戰皆捷因義上胡元并敗死古田賊乘勝復陷縣治文燧奮義鼓勇復率弟侄合兵夾擊賊大敗走追至上黃橋復敗之斬獲數百人時行臺遣都鎮撫邁里古思帥師專征將與會兵方岩賊掩至松明橋擊却之又陣於剝棕嶺以逆官軍諸軍四面合擊賊遂大潰枕尸三十餘里諸將分道窮追於是賊降地方悉平論功加文燧

等官復皆辭不受。及王師下婺城，文燧籍其衆歸附。授永康翼左副元帥，知縣事。遷中書管勾，轉嘉興府知府。松江民亂，襲嘉興。文燧使告總帥李文忠，遣兵擒獲。諸將欲屠城，文燧力爭止之。入朝，勸往諭奢，獲國行次典化，卒於驛舍。

浦江吳左元帥吳志德

蔣可大附

吳志德，浦江人。元季盜起，偕同里蔣可大協謀，倡衆捍禦。民賴以安。戊戌，行省左丞李文忠帥兵下浦江。志德與可大率衆迎謁，留置麾下。德取諸暨、處州，功多。授志

德浦江翼左元帥。可大副之。未幾。皆以病辭歸。志德與兄志道。友愛甚篤。誓不分異。傳及五世。皆同居。子孫繁衍。遵其家法至今。

吳啟明文秀

吳文秀字啟明。浦江人。有膂力。習騎射。兼知韜略。元末寇盜縱橫。乃集鄉人。累石爲砦。以扞鄉井。及王師取紹興。啟明率衆來應。以計開錢清濠。兵遂大捷。勅免其家差役。以旌其義。後授宜武使。卒於家。

義兵千戶葉良器

良器景陽孟圭師正附

葉良器青田人慷慨有大節元末擾攘良器團結義勇保捍井邑總制胡深薦授義兵千戶勦山賊及征方谷珍克平陽城功最陞萬戶戾攻瑞安深入敵境被獲不屈死事聞詔存恤其家胡深爲文祭之哭以詩哀感三軍無不隕涕良器弟良殷子景陽景陽子孟圭孟圭子師正俱以義勇殺賊有保障功

駕前親軍指揮周得璠

周得璠東陽人自少好勇有大志家世業農得璠每倚鋤而歎曰終歲胼胝不得一溫飽大丈夫願甘爲溝中

瘠乎乃賣牛買馬改農器爲長刀躍馬舞刀便有封狼
居胥意喜曰以此取富貴足矣 太祖高皇帝兵克婺
城得璫委身歸附每遇敵先登陷陣功多累授正千戶
尋陞駕前親軍指揮僉事 上以其勇而有謀命鎮守
北平永樂間胡虜犯邊得璫出奇兵攻破之追至黑松
林獲其輜重斬級過當陞隆慶衛指揮同知子孫世襲

吳伯榮壽孫

子仁附

吳壽孫字伯榮浦江人見義勇爲里中惡少有乘亂殺
人者壽孫忿然曰鼠輩恣肆不執罪不容誅是而可忍

孰不可忍。幸子弟捕獲送官。置諸法。人心肅然。思亂者戢影以去。一鄉皆稱爲新塘義士。子仁富而好施。以急告者未嘗不折券相付。遂以財後使里中數百家。戊戌冬。王師下婺。寇多竊發。仁簡其素所後使者得拳勇五百餘人。授甲置砦。畫地以守。縣境賴其保障。朝廷嘉其功。授以官。辭疾不拜。晚築室新塘之椒山。宋太史漁題其顏曰施惠庵。里人因稱爲惠翁。

陽朔縣知縣蔣公直

蔣公直。象山人。智勇絕倫。處鄉里。恂恂執禮讓。孝友篤。

至人無間言。洪武初，蘭秀山賊據縣治，四出剽掠，衆莫能禦。公直謀於縣令孔立躬，先率衆伏寶梵寺，出奇攻賊，大破之，禽其渠魁，梟首以徇。招徠脅從者數百人，邑賴以安。事聞，賞白金五十兩，擢桂林府陽朔縣知縣。時居民不識蠶桑，公直令之植桑，仍市蠶種於他郡，教以飼蠶之法。民遂衣被至今，卒於官。

燕山左護衛指揮僉事陳良輔翼

父典附

陳翼，字良輔，長興人。父典，字朝傑，生元季，才識不羣，有聲里社。楊左丞辟除萬戶。時天下已亂，落落無所遇，仗

策歸附我。高皇帝從征伐，備宿衛，累功。陞驍騎前衛百戶。從征雲南蠻洞，力戰死。翼襲職行間，特授濟陽衛世襲千戶。戊辰，征魚兒海子。庚午，征以都山。辛未，征鴉寒山。乙未，出擊遼東野人，累功，特授燕山左護衛。世襲指揮僉事。庚寅，太宗皇帝舉靖難之師，翼已籍近屬，自安定門始事。及渡江，率甲四千，環數千里，大小二十四戰，略定二十餘州。國必取，攻必破，援必濟，師交必全勝。未嘗少挫。己卯，以白溝河、濟南功，陞指揮同知。庚辰，以東平、汶上功，陞都指揮僉事。是年六月，平定京師。陞

鎮國將軍陝西都司都指揮同知尋命掌金吾右衛事
永樂己丑扈駕還北京進階榮祿大夫中軍都督府都
督同知後二年數將神機營軍馬扈巡迤北至和林逾
土刺河擊斬胡寇瓦刺人畜殆盡後七年上素知翼
老成可屬大寄詔徃南京督府視事洪熙改元仁宗
皇帝念翼勲舊召還任北京未幾有疾詔給醫藥調治
久之不能起宣德三年卒壽六十有二訃聞輟朝一日
給喪具道里費勅有司卹長典祖塋治葬從一品制翼
年少神觀高偉聲如洪鍾讀書善騎射以才氣自負及

爲將矜而不肆。嚴而有恩。又能先機倡勇。制變履危。耀
其整旅之間。敵常不戰而自却。非獨長驅銳進。能用其
死力而已。戰勝之日。務以弔殘恤寡爲事。未嘗妄殺一
人。故士卒樂附。所向成功。爲一時名將云。

都指揮同知蔣貴

蔣貴。諸暨人。長軀偉幹。多膂力。善騎射。未嘗讀兵書。而
行軍多與暗合。發跡行間。以從征胡寇有功。累陞都指
揮同知。西虜阿台朵兒只伯數侵盜甘涼諸邊。戍殺掠
吏人。羽書旁午。以貴與任禮爲左右副總兵。率師往伐。

而一受兵部尚書王驥節制得一切便宜當是時都指揮使安敬爲偏將驥而怯貴與都御史曾翼追虜至魚海子將及之而敬謂前途無水草不可進引還曾翼言狀上審勅驥責貴死狀而優敬軍中以徇於是諸將士皆股栗莫敢仰視驥乃請分兵蓋地自莊浪西南抵黃河東北抵寧夏屬都督李安自涼州北抵鎮番南抵古浪東北抵板井屬都督趙安自甘州東過山丹抵永昌北抵騰朥堡西抵深溝壘屬任禮自肅州東接深溝稍東北抵鎮夷西抵嘉谷北抵天倉屬貴約以賊小至

則各自爲戰守。大至則并力拒敵。軍勢遂大振。尋下詔。以禮爲平羌將軍。貴與趙安副之。而驥特爲監督。討阿台。朵兒只伯諸進取。悉聽驥謀。虜營狼山等處。乃選精騎授貴。使爲前鋒。而自將任禮等。以大軍繼之。且與貴約曰。勉旃。不能成功。毋相見也。貴感奮。前前搏虜。敗之。虜渡黃河。遁去。貴又追敗之於石城。虜食盡。竄兀魯乃地。北依阿台。貴復以精騎二千五百。出鎮夷間道。兼行。三日夜。及而大敗之。得其左丞脫羅及裨校百人。斬首三百餘。獲金銀璽甲各一。駝馬兵甲以千計。朵兒只

伯與阿台以數騎遁，尋賜死，而任禮兵亦窮追五百里，餘降其平章阿的平并部落數十帳而還。捷聞，貴禮皆進封伯爵，而驥兼大理寺卿，還部理事久之。麓川宣慰司思任發叛，雲南總兵沐晟與弟昂討之，數不利，晟至以憂死。上特拜定西伯貴爲平蠻將軍，驥仍總督軍務。率副將軍李安、劉聚等，大發兩都諸鎮漢土兵合十五萬討之。瀕行，賜驥黃金兜牟、細鍔、蟒繡緋衣、朱弓矢，驥乃馳傳至雲南，而貴等兵集。驥乃奏上方略，請遣叅將冉保等由東路直取孟定，會木邦車里夷兵而貴

率大軍由中路至騰衝與保會倖賊腹背受敵從之冬十月貴等抵金齒其別酋陶孟刀門捧以鎮康降因其衆破昔刺寨進攻孟通遂圍上江因風焚其排柵大破之斬賊五萬餘級上江平遂由夾象石渡卜江通高黎貢山道移駐騰衝進於木籠山而思任發令陶孟輩者軍心等以二萬餘衆乘高據險爲七營相救貴遣劉聚宮聚分左右翼緣嶺攻之不下貴乃自率中軍以進來擊之遂破殺輩者軍心等乘勝至馬安山麓川大震尋敗其衆陣於泥溝箐復敗其衆陣於

擊泥寨斬首

虜二千餘級，遂進圍麓川，縱火焚其門，并庫藏廬舍皆盡，俘斬及溺死者數萬人。思任發夜携其二子走孟養，以大捷聞，詔令班師，遣戶部侍郎王質齋羊酒迎勞數百里外，既入見，慰勞有加，封驥靖遠伯，子孫世襲，賜誥券，貂蟬冠，朝服，玉帶，白金百兩，綵幣十表裏，鈔萬貫，而貴進封定西侯，賞亦如之。當是時，思任發尚在京也。其子思機發復率其餘衆往來窺伺，乃復命驥總督雲南軍務，率諸將士往圍之。驥至，思任發復走緬甸，索之不獲，而思機發衆漸盛，不能制，乃奏請益兵，詔復遣定西

侯貴以兵五萬會討然緬甸卒不肯送恩任發以恩機發致讐爲解驥等無如之何貴乃縱兵搆恩機發寨獲其妻子家屬及從賊百餘戰象十一詔還京師加祿定西侯貴歲五百石驥三百石其白金鈔幣如初未幾疾作薨於位貴果勇善戰自卒伍至爲大將身經五十餘戰未嘗敗北每遇大敵無不先登陷陣驥前後皆賴之以成大功而身退不言無纖毫矜伐之色驥以故嚴重之訃聞進封經國公謚武勇

仁和衛千戶王時泰業

王業字時泰其先高郵之興化人曾祖祥元季從軍浙西國朝兵下臨安率先歸附授仁和衛副千戶再調吉安祖斌父成世其職當時稱為將家業體貌豐偉多才幹年十六父喪明襲職京師適單駕北征例當扈從業在軍中勤循紀律而勇略過人同事者皆驚異之曰南人少年能是乎既凱還復任吉安時年雖少而言動若老成人遇當為事慷慨無所顧避雖專督屯事而一軍之政務咸咨焉境有急必以屬業梅花峒寇作會議曰彼恃險為亂攻急則退不與戰緩則肆非王侯莫之

武功

卷之二十一

十一

光緒堂

能平衆推業往未踰月果平之永豐大盤山賊首曾子
良聚衆劫殺勢甚盛將及於縣縣遣人告急郡守陳本
深謀於業業知守意欲以扁已乃奮然曰兵固不敢擅
調然民患之急如此可坐視乎古有先發後聞者我其
行矣即日選精兵二百餘人倍道以行或諷其急業曰
彼賊烏合之衆耳計無所出若少緩則有備兵法各有
所用也業果卒至逼其營賊惶懼出戰一鼓而勝之
捷聞陞本所正千戶無何而閩浙寇起遣大將寧陽侯
性討之吉安軍當調業統以往從都督劉某殺丁公崖

賊業常爲軍鋒、大軍潰而業之軍獨全、浩然歎曰、吾不得用其智而徒制於人、上不能爲朝廷殺賊、下不能爲生民除害、何以名爲人臣哉、故以是不得論功陞賞、以鬱憤卒、年四十有九、業爲人輕財好義、遇賢士大夫、傾竭無所惜、其撫馭士卒、嚴而有恩、臨陣勇氣勃發、目光如電、橫戈而往、前無堅敵、有古名將風、惜生非其時、不得究其才用云。

懷遠將軍崔惟正端

崔端字惟正、海寧衛指揮僉事、少有大志、偉軀幹、多膂力、

武功

卷之三十一

三

光緒堂

力騎射精捷。器識不羣。生平無狗馬之好。喜觀古圖書。禮接賢士大夫。相與講究。九邊阨塞。及天下險要。南倭北虜。策其情事。如指諸掌。居常輕裘緩帶。操壺雅歌。及臨戎應事。議論英發。無顧忌。聞者奪氣。卽其歸。內寬外嚴。士亦以此附之。景泰間。倭入貢還。所過求索。至攘敵手。刃人。經浙藩檄端防護。端耀兵戢旅。隔之以威。重倭酋帖服。威能動遠。自是而東南十餘年。絕無倭警。無何而處婺山民相扇。弗靖。詔遣都督徐恭。總內外兵數千。往剿之。恭聞端有文武才。檄爲前鋒。端率勁兵。擣其巢。

生禽賊首，陶得禮上功幕府，進指揮同知。署箭後把總，分守浙東。端感激自奮，竭精神思慮，水陸之行無一日休用，能備舉廢墜士馬，精強而勞頓，因愈疽發於背，疾革大呼曰：大丈夫不以馬革裹屍，竟死於床第間乎！言畢而逝。時側室于雲生，僅六月而端就木，年僅四十三。

山西道監察御史項思誠

魯孫守禮附

項懷，字思誠，奉化人。登景泰辛未進士第，授湖廣道監察御史。丁憂服闋，改授山西道，奉勅征討四川筠連等縣蠻夷，衝命以往。每懷靡及，至則親冒矢石，率先戎行。

險阻嵐瘴一無所避。出奇奮斬。奮夷悉平。因積勞致瘁。力疾回朝。復命卒於邸舍。以死勤事。而邸典不行。識者惜之。曾孫守禮舉進士。官至山西按察司副使。以風烈稱。

劉原熊

劉原熊松陽人。世居蛤湖。父惟賢。徙居澄川。原熊生而雄毅。負奇節。正統間。陶得義等倡亂。松之男女多避難於橫山寨。寨去澄川甚邇。守寨者謀諸少年曰。吾聞典師聚衆而無主。則兵無節制而易敗。非萬全策也。此間

有劉原熊者義士也。智勇足備，可以爲吾輩主。盍往求之。諸少年曰：諾。各捐簪珥，請原熊門。諸少年膝行而前，曰：吾儕小人，創於賊，不得不蟻聚以求生。顧智不足以相謀，勇不足以相勦。人多而耳目不齊，心志不一，適生亂以速斃耳。竊聞長者高義，願以諸人之父母妻子爲託，不腆簪珥，願爲長者千萬歲壽。原熊正色却之曰：賊因財而致亂，子復因亂而受財，相去幾何。諸君果真心推讓者，子請以七尺爲報。諸少年大喜。原熊因椎牛置酒，悉召諸少年酣飲之，立盟於社。原熊登壇而盟之，乃

下令曰聞鼓則進聞金則退臨陣回顛者斬諸少年無不凜然於是嚴陣以待已而賊至原熊執戈先登諸少年皆呼噪挺戈而前無不一當百賊懼退居城北會夜有携妻子東逃者賊獲之遂盡知寨中虛實次日大風賊乃乘風縱火劫寨原熊率衆力戰於野斬賊首四級餘賊數百人賊大敗遁走而原熊亦以陣亡諸少年哭之甚哀仍捐簪珥刻木肖原熊像祠之於社曰公以此始亦以此終血牲醴酒各率其父母妻子哭拜於祠下而後去

王剛甫

王剛甫，象山人，倜儻負氣節，讀書略通大義，攝東門巡檢。時蘭秀山賊反，襲縣，虜令丞入海。剛甫與友蔣公直謀曰：「狂妄虜我令丞，據我縣治，罪宜誅死。」事聞於朝，大兵必來邑，民盡受害矣。盍先格殺之，乃募衆掩擊，殺其渠魁，釋其脅從者若干人。初，天兵聞亂，將屠邑，京軍二萬已發錢塘，而賊先投首，遂不果渡江。而回邑人聞之，泣曰：「微王君者，吾邑數萬人俱登鬼錄矣。議者謂是舉力出公直謀資剛甫。」

指揮僉事彭懷遠程

彭程字懷遠海寧衛指揮僉事素負膽略知天文正統十三年沙縣賊鄧茂七據延平稱剗平王都督劉聚檄程率兵往討禡祭邑生司禮者瘞毛血益怒躑地碎程拔劍欲斬之生聽而言曰此吉兆也賊寔然破矣程喜遂鼓行而前號令甫下旗幟赫然一新明年正月哨延平下營適某帥招飲程移營不赴帥不悅其夜賊劫程舊營不值驚遁走明日程入謝帥知之始大敬服且問故程曰下營時有怪風占必有偷營者故移營以避之

一軍皆稱爲神明。當是時，鬪帥屯兵大山。程兵寡傍溪結營，賊酋朱必森率兵隔溪過，呼其屬指而語之曰：「吾此去先滅大營，回軍盡殺此奴輩，當以饒饒爲酒器，與諸君痛飲耳。」我軍聞之色動。程亦以衆寡難敵，遂下馬，徧拜衆軍曰：「使賊果得志回，我屬無噍類矣。諸君須奮勇當於死中求活，顧甘作賊機上肉乎？」諸軍齊聲以應曰：「諾。」無何而賊果乘勝回，下溪水挑戰。程令諸軍跣足迎之，半渡賊鞋襪沒水中，拔足不能出，擊之大敗，追奔數十里。初程率兵赴鉛山，圍木柵作城以拒賊，賊數挑

戰軍士郭阿保善舞牌劉蠻驢善使鐵叉二人相議曰
我與若素號驍勇今不與戰是怯也郭先跳出木城有
騎賊從焉斧之郭以牌迎斧乘勢伏地以進劉舞叉前
支其斧郭忽滾牌起斬其馬足賊墮劉刺之斃乘勢進
攻賊大敗程軍牌皆黑緣賊望見黑牌軍輒驚曰彭家
軍來矣急遁去遂進攻前後洋兩寨及鴛峯山大竹口
嚴家島黃金井連戰皆捷累斬首四百級禽首賊三招
撫脅從者凡一千二百三十餘名九月凱還景泰元年
賊葉宗留復叛率兵往溫州征之多五月守永康七月

游義沙灘渡大戰最十一月次麗水搜山十二月哨日
毋沿滄攻麻陽龍潭破二年五月天井背大戰追至紫
草庵周秦寨累斬首六十一級禽首賊五三年四月兵
部歷敘程戰功以請爲官路所抑僅陞指揮同知功大
而賞薄論者至今惜之

都督同知牛允武桓

牛桓字允武麗水人由處州衛指揮歷陞後軍都督府
都督同知桓沉重嚴毅清慎忠勤折節賢士有敦詩悅
禮之風兩鎮貴州夷人仰之如父母分守左江士民號

泣擁馬首。邀送出境者數千人。所至令行禁止。或夷寇竊發。旌旄所指。無不立折兇首。每臨陣。親執桴鼓。立門旗下。意氣凜然。犯令者立斬之。然未嘗妄殺一人。得賞賜。悉散諸將吏。不以一錢私幕府。以故士卒樂用。所向克敵。如落蒙。寵遇方隆。急流勇退。雖致位樞府。而彼服如寒士。士論益賢之。

海寧衛左所百戶陶炳

陶炳嘉興人。海寧衛左所百戶矣。也喜談兵。工騎射。正德初。虜騎問一劍。光芒射斗。炳隨以將材舉。從討開黨。

累征蔡六二王浩入陳邦四俘獲過當陞本衛正千戶
乃顏其堂曰瑞劍

海寧衛正千戶浦正

浦正海寧衛左所正千戶果毅沉雄曉暢兵法每以生
當平世不得一見其奇爲恨正德間部軍器上大司馬
忽與寇遇寇橫陣而來正手射其前鋒四人應絃而倒
寇大駭散去行至滄州首寇劉六劉七率衆萬餘人臨
境守臣欲委城遁正厲聲曰朝廷築城以衛民設官以
守土君去城誰與守將委數萬生靈於賊手乎適仁和

胡世寧以公事道出滄州聞寇且至乃引車入城正聞之大喜曰胡公至無慮賊矣乃白守共請世寧請授方略世寧令守簡其精銳授甲登埤以正節制之正與寇相持凡八晝夜寇中矢石死者千餘人力竭解圍而走滄州乃完尚書張縉疏正功不報當是時正之名聞於西北未幾從征開常深入敵陣後軍不繼遂被害詔贈明威將軍子潮陞指揮僉事

嘉興所正千戶張淮

張淮太僕敏之子。儻有大略。正德間蜀寇猖獗。太僕

兵備利綿有。廖麻之難。淮閉變。馳入賊壘。願與父同死。侃侃陳利害。嚼齧而語。目皆出血。與波俱下。賊壯而出之。後數從太僕軍中。戰通江門鎮。有斬獲功。別從延綏。奉將張鳳。征倒塔兒等處。斬首虜四級。時閣臣楊一清。行邊甚器重之。以將材薦。授嘉興所正千戶。稍歷蕪州衛指揮同知。

都督同知萬民望表。

萬表字民望。寧波人。生有異相。玉色方頤。額有三文。風神炯炯。慷慨多大節。讀書一目數行下。年十七。襲指揮。

會事志在鵠起不事家人業晝習騎射夜燃燭讀書揭
孔明寧靜澹泊四言座右口丈夫經營天下如武侯然
何能頹首作求田問舍計予以武舉第一授都指揮督
全浙糧運晉視浙江圖篆南都坐營錦衣已爲磨運恭
將拜總兵掛印累遷南京中軍都督府都督會書皆以
宿望爲當軸所推較表歷漕既久國計盈誦河渠通塞
祖制及時弊當復當廢靡不明習大者疏小者議累累
千百萬言且極陳本折通融爲國長利而又欲開河北
山東圻內一帶荒田重農薄賦爲漸減歲漕之地尤根

本至論議者。避之。歲甲寅。海上倭亂起。表散家財募死士。奮欲往擊。會以都督僉書南京中府道。經姑蘇。與倭遇婁門。楊涇偁表率所募士。躬冒矢石。挫賊鋒。身中流矢。不爲止。時賊據七團八圍。爲巢。我軍數戰不利。表謂巡撫周珣曰。賊據內地久。近賊處。民不得力。田逋負日多。催科敦迫。相率去。而爲賊是擊之。以助其勢也。宜亟請捐積逋。懸賞格。使就中作計。以携其黨。兼下募兵令。土著之餉等。客兵則人人樂歸。如得士千。卽賊減千人也。以較用他兵。孰利。議行。歸者。寢衆。賊寢衰。乃進兵賊。

懼宵遁。殲之海上。焚餘皇若干。內地稍踈。賊方蜂屯諸島。而欽人王直者。以驍雄魁其首。表策其踈。而可誘而縛也。薦鄞人蔣洲。張惟遠。使爲間。兩人雅善直。其家坐通番。逮約獲直。以贖。且以上賞許之。日強聒當路前。未及行。而表卒。後總制胡宗憲卒。遣洲。渠魁立。致東南晏然。一時謂爲奇功。不知皆表本謀也。表策夷情。洞如指掌。而論比虜。尤人所未發。嘗曰。古夷伙侵中國。未有中國人不爲之用。而能突人者。夫華夷異類。居處寢食。絕不相同。豈甘心卉衣冠爲大羊荻哉。不得已也。自屯田。

鹽法廢而邊儲日不克、邊儲不克而士卒殍死者衆、殍死者衆而士心日益離矣、士心日離、叛亡日衆、叛亡之卒、虜皆厚遇之、與婦生子、給以牛馬、享息土、俗漸宜、心無變反、而後用爲竊導、故地里之迂近、兵力之強弱、貨財盈虛、人心離固、將帥勇懦、事勢難易、皆得預知之、而諸邊飢餓、餽餉瘁之卒、間先叛亡者、幸少須臾無死也、輒相繼以亡而不亡者、亦無固志、是則深可憂耳、夫虜之來也不測、而我之禦也無時、諸邊日夕營營、以目前爲事、何暇爲根本計乎、此所謂決陵以取魚、圖一朝之

利者也。先是庚戌虜闖入塞內，傳大都表聞之。日夜東
裝爲行計，曰：吾世受國恩，今憂及君父，豈臣子安卧時
耶？尋事定乃已。表少嗜玄學，已而思內典，獨契於心，泰
究不輟。一日披衲入伏牛山，曉行見日升，忽大悟，爲文
敏給疎暢，直寫胸臆。歷官四十年，家無餘財，餅鉢蕭然。
與野衲偕遊，見者不知其爲名將也。一夕無疾端坐而
逝，星隕於庭，光射數十丈云。

溫處守備盧子鳴鐘

盧鏗字子鳴，麗水人家。世武弁，好樂儒術，敬禮士夫。屋

傍山池幽雅如畫脫堦登卽褰角巾與士大夫觴咏其中守備溫處屢禽劇賊許二等及倭夷入寇十餘年烽火不息定謀僂力俘其渠魁徐海王直等地方以寧歷官浙直總兵沿海居民祠祀之

金叅將丹

金丹嘉善人卜居秀水少爲諸生喜談韓淮陰張睢陽事尋生註誤當立功遂弃而學武龍韜虎鈴無所不窺尤精著數能算計見效會島夷內訌賈勇先登制府檄爲間諜嘗從戚大將軍行間多所俘斬累功歷官叅將

解構家居穆然儒雅不識者不知其爲人將云

朱總兵先

朱先秀水人讀書不成去學劍替力膽略千人辟易慨然有封狼居意嘉靖間倭躡東南胡少保宗憲懸賞格購倭首先所手斬數十級盡以獻之幕府及頒賞不受曰大丈夫志在立功何以賞爲宗憲奇而用之歷疆場凡四十年累官總兵絕聲伎之好亦不置田宅園圃輕裘緩帶有古儒將風

台州衛指揮僉事陳大成

陳大成義烏人家於倍磊以雄武稱嘉靖三十七年八
寶山礦徒嘯聚萬餘人四出焚劫閩境震恐大成糾率
義旅力剿除之遂以武生應募統率子弟兵五十赴台
州防守四十年四月倭寇屢犯台州花街白水洋等處
叅將戚繼光調遣大成督領王如龍陳子璽等奮勇衝
鋒俘斬倭首一百四十餘顆被掠男婦三千餘人
既而調往江西援剿流賊戰於弋陽上方復部斬首級
一百六十四顆四十一年倭賊入犯大卡又敗之於烏
根嶺屢獲全勝功視諸將爲多先是福建興化被陷倭

營窟於城中者月餘。分倭攻掠旁縣。全閩告急。至是大
成統率隨戚參將轉聞而前。直抵福興。克復城濠。倭寇
悉平。前後凡告捷者十有二。欽賞金銀牌面者三。加陞
祿秩者一。歷授台州衛指揮僉事。尋轉浙江管理中軍
都司。時倭寇雖殄。而士卒多虛糜口糧。民不勝供億之
困。大成乃建議領兵屯操。每年汛期。酌給常廩。出守解
汛。則減糧回縣。逢五赴操。遇警聽調。兵既得以附家。地
方又可保守。當事者如議。量減歲省金錢數萬。民困爲
之稍甦云。

范文學希雲

范希雲秀水人以明經補郡博士弟子員少負奇氣喜讀兵書嘗語人曰吾以七寸管與黃口小兒爭長於風箏寸晷之間何如獲三尺劍策馬於萬軍中取上將頭乎會倭寇寇郡所募簡兵授甲使材武士將之希雲請獨當一面遂授先鋒率所部禦倭於平湖出奇設伏大破之追至白馬堰接戰三晝夜所殺過當以援兵不繼陷陣死年二十有六